



Olga P. Berthelsen
Naaja Nathanielsen
Inatsisartunut ilaasortat, Inuit Ataqatigiit

§ 37 naapertorlugu arnat angutillu suaassuseqatigiillutik aappariit oqaluffimmi katissinnaalernissaat pillugu apeqqummut akissut

Asasakka Olga P. Berthelsen aamma Naaja Nathanielsen, Arnat angutillu suaassuseqatigiillutik aappariit oqaluffimmi katissinnaalernissaat pillugu apeqqummut qujanaq. Apeqqumit ataatsimut akissuteqarfigerusuppakka, matumalu kinguliani apeqqumit akissuteqarfigineqarput.

Apeqquq 1: *Arnat angutillu suaassuseqatigiillutik aappariit oqaluffimmi katissinnaalernissaat qaqugu nunatsinni atortuulersinneqassava?*

Apeqquq 2: *Atortuulersinnissaa siunertaralugu Danmarkimi Naalakkersuisut saaffigineqareerpat?*

Akissut: Aallarniutigalugu paasissutissiissutigisinnaavara Inatsisartut 2010-mi ukiakkut ataatsimiinnerminni siunnersuut akuerisaat tassaammat allannguutissatut siunnersuut Kultureqarnermut Ilageeqarnermullu Ataatsimiititaliamit suliarineqartoq. Inatsisartunut ilaasortap Justus Hansenip, Demokraatit, siunnersuut saqqummiussaa oqaluffimmi katinermut maleruaqqusat sulii danskit inatsisaanni oqartussaaffigineqarnerat pillugu Naalakkersuisut paasissutissiinerat tunngavigalugu ataatsimiititaliamut suliaassanngortinneqarpoq. Siunnersuut Inatsisartunit akuerineqartoq ima oqaasertaqarpoq:

"Suaassuseqatigiinnik oqaluffimmi katititsisarnissamut inatsisitigut tunngavissiisoqarsinnaanngorlugu katittarneq avittarneq pillugit Folketingimi Kallallit nunaannut inatsisissatut siunnersuuteqartoqarnissaa siunertaralugu Naalakkersuisut ingerlaannarlutik danskit naalakkersuisuinut saaffigineqqullugit peqquneqarnissaat pillugu Inatsisartut aalajangiiffigisassaattut siunnersuut."

Tamatuma kingorna Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik (maanna: Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfik) ilaqutariinnermut tunngasutigut inatsisitigut suliaassanut akisussaasuusoq Naalakkersuisut siulittaasuata Naalakkersuisoqarfianut saaffiginnippoq qinnuigalugu oqartussaaffimmut atatillugu inatsisip allanngortinneqarnissaa pillugu danskit naalakkersuisuinut saaffigineqqullugu. Tamatuma kingorna taama allannguinnissamik qinnuiginnissut Naalakkersuisup siulittaasuata Naalakkersuisoqarfianit danskit naalakkersuisuinut nassiunneqarpoq.

2012-imi juunimi danskit Folketingiata akuersissutigaa inatsisissatut siunnersuut nr. 106 *Katinneq avinnerlu pillugu inatsisip, katinnermi inatsisitigut sunniutissat pillugit inatsisip, eqqartuussisarnermi inatsisip aammalu aappariittut nalunaarsorneqarneq pillugu inatsisip atorunnaarsinneqarneranik inatsisip allanngortinneqarnissaannik inatsisissatut*

14-09-2012
Sags nr. 2012-066286
Dok. nr. 1013118

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: ikinn@nanoq.gl
www.nanoq.gl

siunnersuut. (Suaassuseqatigiit katinnerat). Akuersissutigineqarnera Kalaallit Nunaannut toqqaannartumik sunniuteqassanngilaq aammalu Kalaallit Nunaanni maanna periuseq sunnissanagu, tassami pissutsit taakku peqqussutigut immikkut ittutigut maleruagassiorneqarmata.

Taamaakkaluartoq Danmarkimi allannguutissatut siunnersuutip, suaassuseqatigiit oqaluffimmi katissinnaanerannut periarfissiisup akuersissutigineqarnerata kingorna danskit naalackersuisuinut allakkanik allanik nassitsisoqarpoq. Allakkani taakkunani erseqqissaatigineqarpoq Kalaallit Nunaanni suaassuseqatigiit oqaluffimmi katissinnaanerata aamma kissaatigineqarpoq. Taamaattorli Kalaallit Nunaannut peqqussut atuuttussa qaqugu naammassineqarsinnaanersoq danskit naalackersuisuinit suli nalunaarutigineqanngilaq.

Inussiarnersumik inuulluaqqusillunga
Med venlig hilsen

Mimi Karlsen